

# Qalam

KDN 434

154 Dhu al-Hijjah 1382, Mei 1963, 60 sen

## Perjumpaan Kadi-kadi di Seluruh Persekutuan

Bagi kali yang keduanya rancangan mengadakan pertemuan di antara kadi-kadi negeri-negeri di Persekutuan Tanah Melayu yang dianjurkan oleh Selangor telah dibatalkan. Sebabnya adalah difahamkan kerana kurangnya sambutan dari kadi-kadi itu sendiri.

Latar belakang tujuan mengadakan perjumpaan itu adalah yang utamanya memikirkan perihal banyaknya perceraian dan perkara-perkara kahwin lebih daripada satu. Selangor, adalah telah menjalankan langkah-langkah untuk memperundang-undangkan perkara yang difikirkannya mustahak dibuat. Di Selangor, tiap-tiap seorang suami tidak boleh menceraikan isterinya melainkan di hadapan kadi dan perceraian itu hendaklah dipersetuju oleh isteri itu sendiri. Juga seseorang yang ada isteri, kalau mahu berkahwin lagi, mestilah terlebih dahulu mendapat kebenaran Pejabat Kadi setelah berpuas hati tentang keadaan dan kemampuannya. Keadaan peraturan yang berjalan di Selangor itu samalah seperti yang ada di Singapura yang berjalan hingga sekarang, yang dipandang adalah menyalahi kelulusan-kelulusan yang dibenarkan oleh Allah dan Rasul-Nya dan juga bertentangan dengan syarak.

Mungkin, sebab-sebabnya maka kadi-kadi di lain negeri tidak berkenan untuk bersama-sama bermesyuarat adalah kerana mereka harus berfikir bahawa perkara yang hendak dibahaskan itu adalah berlawanan dengan syarak dan perkara yang berlawanan dengan syarak itu adalah telah pun dijalankan di Selangor.

Tujuan anjuran Selangor itu, harus dipandang oleh lain-lain negeri sebagai suatu tujuan mengajak mereka mempersetujukan perkara-perkara yang mereka tidak tergamak hendak melanggarnya kerana mereka masih takut kepada Allah dan rasul-Nya dan balasan-balasan pada hari kemudian.

Ini dapat ditelaah daripada beberapa siaran jabatan agama negeri-negeri itu sendiri. Kalau pembaca-pembaca perhatikan siaran Jabatan Agama Kedah, (ada sebahagiannya disiarkan dalam keluaran ini), terang dan nyata bahawa mereka menunjukkan tidak setuju dengan apa yang telah dijalankan di dalam sekatan berkahwin apa lagi dalam perkara cerai yang meminta izin terlebih dahulu-dahulu dari isteri.

Siaran-siaran yang diterbitkan oleh jabatan agama itu sebenarnya lembut kerana mereka tidak mahu menunjukkan bantahan. Mereka hanya memberi pandangan-pandangan sahaja di atas sesuatu perkara. Tetapi kalau dibaca dapatlah difaham bahawa mereka tidak sepandapat dan sependirian dengan perdirian Jabatan Agama Selangor.

Kita mengangkat tangan kepada kadi-kadi yang tegar perdirianya yang memandang bahawa tidak ada faedahnya mereka berhimpun merundingkan perkara-perkara yang boleh dipandang mengadakan sesuatu peraturan agama yang didasarkan kepada kemahuhan dan bertentangan dengan hukum syarak. Mudah-mudahan perdirian yang serupa ini kekal. Bahkan umat Islam berharap semoga Jabatan Agama itu terang-terang membantah di dalam perkara-perkara seperti itu dan tidak hanya memberi keterangan sahaja supaya umat, khususnya orang-orang umum, cukup mengetahui keadaan sesuatu hukum yang bakal dijalankan.

\* \* \*

## Sukarno dengan Telatahnya

Suatu perkara yang sangat menghairankan orang-orang di Tanah Melayu, dan juga harus di seluruh dunia, ialah telatah ucapan Sukarno sesudah ada persetujuan untuk mengadakan persidangan tiga kuasa di Manila yang akan dimulakan dengan Persidangan Menteri-Menteri Luar Negeri.

Ucapan Sukarno itu dengan tegas menyatakan bahawa ia terus membantah tertubuhnya Malaysia dan mengugut